

四庫全書

史部

欽定四庫全書

史部

世宗憲皇帝上諭八旗卷五

詳校官左都御史_臣李綬

編修_臣裘謙慶助

總校官降調編修_臣倉聖脉

校對官編修_臣沈清藻

謄錄監生_臣毛鴻儀

欽定四庫全書

世宗憲皇帝上諭八旗卷五

雍正五年正月初十日奉

上諭降旨與火器營大臣等火器營兵丁甚屬緊要必於

馬上勤加操練始為有益嗣後俱著於馬上操演學習

特諭

雍正五年正月十三日領侍衛內大臣等奉

上諭年節下天氣寒冷凡早朝之大臣等俱穿朝服而來

及過上朝之時又換蟒袍更換衣服不得和暖所在又值天氣寒冷恐或致受感冒嗣後凡祭

壇

廟陞殿筵宴令穿朝服若常朝會集等處即穿補褂蟒袍特

諭

雍正五年正月十三日諸王大臣奏賀黃河澄清懇請

陞殿行禮奉

上諭覽諸王大臣等奏稱河水澄清二千里期逾兩旬為從來未有之瑞懇請陞殿慶賀朕嘗言天下至大庶務至繁斷非人主一身所能經理必賴內外臣工協力贊襄然後可以成一道同風之盛若上有涼德之主而下皆臯夔稷契之臣則工虞水火佐理有人政務亦不患其不舉若上有堯舜之主而下皆共工驩兜之輩則耳目股肱無所資藉政務亦必至於廢弛故人君之道以得人為要而人臣之道以奉職為先此一定之理也朕

統臨萬方雖刻刻有勵精圖治之念然必賴內外臣工共矢公忠各殫才力然後有實政實效及於吏治民生方可以感

天和而錫籙祉不然則朕雖有勤政之念豈能事事躬親辦理之也今見數年之中荷蒙

上天

皇考默佑疊賜嘉祥茲又有河清之上瑞朕細推天人感應之理自非無因當由內外臣工能體朕宵衣旰食之懷

洗陽奉陰違之習分猷効職有數端之善上合

昊天

皇考之心是以錫茲福慶以勵將來爾等試再思之人事甫修僅有數端之善即邀

上天

皇考之嘉貺若此倘能益竭忠誠事事皆善則其獲福又當何如或由此而侈然自足怠惰前修則其獲譴又當何如可不慎乎可不懼乎况天道惡盈朕心方且因此益

加戒儆所請慶賀典禮朕必不行朕念君臣之間實屬一體

上天

皇考既垂訓於朕朕即以此訓及諸臣

上天

皇考既錫福於朕朕即以此福及諸臣凡屬京官自大學士尚書以下主事以上內大臣都統前鋒統領護軍統領步軍統領以下叅領以上凡屬外官自督撫以下知縣

以上武官自將軍提鎮以下叅將以上俱著加一級其王公等管理部院都統事務者應如何加恩之處著宗人府議奏自茲以往內外臣工當益加黽勉精白乃心和衷共濟矢勤矢慎秉公去私凜

天鑒之匪遙念感應之不爽以至誠至敬仰承

上天

皇考之眷佑則受福孔多永永勿替矣勉之勉之特諭

雍正五年正月十五日奉

上諭向因年羹堯狂悖妄亂結黨肆行法難寬宥朕出於不得已將伊治罪又恐其黨援固結不散若將年羹堯諸子留在京師或彼此暗相比附又生事端深屬未便故將伊等徙居邊遠之地曾有旨遇赦不赦今見年羹堯正法之後伊平日同黨之人實皆悔過解散已無一人比附之者蓋年羹堯之結黨為時尚淺是以易於解散非如阿其那塞思黑蘇努阿靈阿鄂倫岱等之黨固結甚深如膠如漆牢不可破也凡屬匪黨若恃強不肯

解散者朕立志必加誅戮斷不寬宥以整飭綱紀除國家之大害此皆伊等自取朕何容心伊等若肯實心悔過解散黨與朕即開恩寬宥矣今年羹堯之黨與既散而當日平定青海伊亦著有功績著將伊子遠徙邊省者俱赦回交與年遐齡管束以示朕格外恩宥之至意特諭

雍正五年正月二十日奉

上諭將軍乃邊境大臣一應動用之處甚多別省將軍俱

已量給養廉銀兩惟奉天黑龍江船廠三處將軍並無
養廉之項著將長蘆鹽課餘銀內動用六千兩分給三
處將軍朕思旗下大臣及有職掌之官員亦宜量給養
廉銀兩著動用兩浙鹽課餘銀一萬兩分給兩翼前鋒
統領護軍統領前鋒叅領護軍叅領前鋒侍衛等再動
用兩淮鹽課餘銀二萬四千兩分給八旗都統以下至
叅領等特諭

雍正五年二月初七日奉

上諭乾清門侍衛著照伊等品級加給俸銀一倍米石不
必加給嗣後凡今在乾清門行走之侍衛俱照此給與
特諭

雍正五年二月二十一日領侍衛內大臣公馬爾賽
奉

上諭凡經朕躬親閱由護軍挑取之侍衛藍翎等遇副參
領及外省應陞之處亦著帶來引見將此旨宣示與八
旗大臣等特諭

雍正五年二月三十日步軍統領阿齊圖摺奏拏獲
大盜史五奉

上諭此賊於三日之內拏獲甚屬可嘉似此等事件爾衙
門應行記檔嗣後凡十日內將賊犯拏獲者爾衙門將
所存之銀賞給以示鼓勵其官員紀錄雖由兵部按例
議給爾衙門亦應設立冊籍嗣後凡有紀錄一次紀錄
二次者存記明白以便稽察又聞夜間行走之人手執
一紙口稱傳事即許其行走如此則不肖之徒詐偽朦

混亦未可定著即傳諭八旗都統大臣若有夜間傳喚之事或用印文或用叅領佐領鈐記關防方許行走如無憑據即以犯夜拏問治罪將此遍行曉諭斷不可輕易放過如此則夜行之人自然禁止矣特諭

雍正五年三月初六日奉

上諭兵丁等喜喪之事俱已加恩賞給銀兩看來大臣官員內有家貲饒裕者亦有家計艱窘者其於喜事尚可若遇喪事倉猝之間必致窘迫無措嗣後八旗大臣官

員內若遇喪事有情願借銀者著戶部借給四個月俸
祿至下季扣除若於未及扣除之前有緣事革職者除
世襲官員外仍令其賠補如病故者著即賞給免令賠
補其行取戶部庫銀恐一時不能即得先將旗下恩賞
兵丁銀兩給與再行取戶部庫銀墊補特諭

雍正五年三月初八日奉

上諭士子讀書應試須專心講習方可望其成就八旗舉
人生員內在護軍執事人行走者朕念其用度艱難恐

致分心是以於雍正元年特加殊恩令其退回仍賞給錢糧養贍俾得專心讀書勉勵上進庶國家可收得人之益今已三年有餘其中或有年力衰邁及不肖之人徒領錢糧無志上進虛糜國帑者亦未可知若不加考課分別勤惰無以鼓勵人材著查弼納查郎阿於會試後將八旗滿洲蒙古舉人生員漢軍舉人查明人數請題考試其考試官將應行開列人負請旨派出分別等第並驗其人品優劣具奏特諭

雍正五年三月十一日領侍衛內大臣公馬爾賽等
奉

上諭爾等宣旨與八旗管兵之大臣等凡兵丁內有能持
硬弓者著各量已所能用之不可勉強朕視六力之弓
與十二力者同恐兵丁等不知妄相勉強於弓力致有
受傷之處亦不可不慎也將此交八旗及包衣佐領各
該管大臣務須徧諭兵丁俾各知之特諭

雍正五年三月十五日奉

上諭嗣後八旗將紀錄之員於歲底彙奏之時但令當月旗寫入案呈具奏其餘各旗不必將案呈寫入若係特旨賞給紀錄者著照常彙奏其旗下應給紀錄者令各旗大臣於奏事之便奏聞再於歲底彙奏特諭

雍正五年三月二十五日鑲白旗護軍統領哈岱等將揀選之護軍校等帶領引

見奉

上諭副護軍校常永人去得著補授三等侍衛遇有本旗

應陞之缺著帶來引見凡下五旗所挑侍衛藍翎侍衛遇有本旗應陞缺出本旗內有勝於伊等者則已如無勝於伊等之人著於領侍衛內大臣處行文咨取帶領引見特諭

雍正五年三月二十五日領侍衛內大臣公馬爾賽等奉

上諭朕聞兵丁等有服藥強用硬弓者若欲學用硬弓亦當從容演習逐漸加添弓力豈可濫行服藥恐不知藥

性人有受傷之處且硬弓在馬上難用學之何益弓至
六力以上足矣嗣後欲用硬弓者不許服藥著嚴行禁
止並將傳方之人訪拏凡肯服藥用硬弓者皆係有心
上進之人若因服藥有誤反致損傷豈不可惜壯健人
材殊為難得爾等傳諭八旗都統前鋒統領護軍統領
等著伊等曉諭管兵人負各將所管兵丁挨次傳知特
諭

雍正五年三月二十六日奉

上諭凡大學士等所奉朕之諭旨必呈覽過然後交出至各部院衙門記載朕旨最關緊要朕之諭旨皆酌其事宜詳剖情理各部院堂官之才智豈能記載周全若止畧記數語而不詳其始末情由則不知此事之人斷不能脩悉其原委所關甚大嗣後各部院衙門凡所奉朕之諭旨必皆呈覽再行登記檔案至八旗都統奏事所奉諭旨有應鈐印傳示者有應口傳曉諭者有泛論者亦有並非朕旨而諸臣誤記者似此不論其應否登諸

檔案而槩行登記者亦必有之著管理旗務之諸王都統等會同將記檔之諭旨查看其記載謬妄者是何意見嗣後八旗大臣所奉諭旨內有應傳示者俱各呈覽過再行鈐印傳示特諭

雍正五年閏三月二十九日奉

上諭聞會試舉人感朕特恩以今年為朕五十萬壽特於京城寺廟設立經壇以申頌祝之意此舉甚為虛妄朕臨馭天下孜孜求治凡所行之事惟以循理為本誠以

理之所在即

天意所在感字默應捷於影響若朕所行悉合於理則問心無愧之處即可以對越神明而輿情之頌祝與否皆可置之不問倘所行不合於理則雖有祝釐祈福之繇文正所謂獲罪於天無所禱也朕儆戒乾惕之切無時或釋於懷舉人乃平日讀書明理之人當效法古之聖賢豈可為此世俗誕妄之舉且朕正念士子貧寒者多歸途艱於資斧是以賞給路費今乃費於無用之地尤不

能體朕之心矣倡為此舉者必係生事浮夸之輩本應查出究問但念羣情踴躍聞風附和者多姑免深究其所設經壇即行禁止朕又聞各省督撫因朕今年五十萬壽欲購覓玩好之物以為進獻者此舉尤為不可夫地方大吏偶有進獻方物土產者不過借此以達其瞻仰之意而朕之酌量收納又復隨便分賜廷臣者亦所以聿君臣上下之情若今年亦只照每年之例備辦尚准其奏達朕前倘別有玩賞之物槩不寓目朕仰賴

皇考福庇在藩邸數十年所蓄器玩頗有及即位後見宮中
傳留古玩器皿皆質朴之物居多實無奇異為人所罕
見者言之於人亦令人難信視朕藩邸所藏尚屬不逮
朕深用抱愧於懷當日二阿哥在東宮時廣蓄奇巧珍
貴之物數倍於

皇考宮中之所有朕仰思

皇考恭儉至德實可垂法萬世欽服之誠切於五內益覺二
阿哥之所為可輕可鄙人人當以為鑒戒也朕既深知

二阿哥之非若朕此時復留心玩好廣收進獻則將來子孫之賢而有識者豈不以此為朕躬之累乎朕意欲俟暇時將宮中所有之物或係

皇考傳留或朕藩邸舊蓄一一分析標記以明

皇考之儉德俾世世子孫共知之又安肯多收玩好以滋朕心之愧乎況朕所見甚多諸臣即竭力購求亦不能出朕所見之外不過浪費貲財於市肆之中令小人得利而已在朕何所取乎朕澄清吏治令督撫諸臣共勵廉

隅即量予公費不過供其日用之需安有餘資搜求玩器倘轉索之於屬貲則又開下吏逢迎奔競之漸尚望其秉公督率整飭官方乎朕心惟以民安物阜為美薦賢舉能為貴倘督撫等秉公察吏實心為國行一利民之政勝於獻希世之珍也薦一可用之才勝於貢連城之寶也當年

皇考五十萬壽時朕再三懇請慶賀因觸怒不蒙

俞允若以朕所強求而不能仰得

皇考之歡心者今朕五十壽躬自舉行於心實有未安至於設立經壇建立碑亭等事在

皇考當日甚鄙而厭之因見諸臣籲懇之切隨便聽其舉行乃朕所深悉者而其中羣下隱情在

皇考實不能深知朕居子臣之位四十年於臣庶情形皆所親見是以不肯復為內外諸臣其共體朕心祇遵朕諭殫竭誠意屏絕虛文勉之勉之特諭

雍正五年四月初六日

召入辦理旗務王大臣等奉

上諭驍騎校赫倫泰將行賄一事首出甚屬可嘉朕特示
鼓舞賞銀一百兩紀錄一次如此等賞罰之處爾八旗
大臣宜遍行傳諭官兵等夫施以恩賞與加以處分並
非為此一人而設蓋欲衆人知其為善皆倣效而行之
知其為惡皆懲創而不行也若不明白曉示則人亦何
因而以善相勉以惡為戒耶嗣後凡恩賞與處分事件
俱著該旗咨送當月旗令其徧傳八旗再部院已結案

件內其恩賞處分有關於旗務者亦著咨送當月旗由
當月旗傳諭八旗交該叅領佐領等將施以恩賞與加
以處分及一應禁約之情由詳行宣示俾皆曉然於何
等事件即得何等賞罰之處庶人各知勉於為善亦可
無誣妄捏造之論議矣若爾等奉行不留心加勉不徧
諭兵丁朕將爾等該管旗內或官員或兵丁詢以傳諭
事件若有不知者即可知爾等之不盡心矣特諭

雍正五年四月初八日大學士九卿等奉

上諭近聞外間議論有謂塞楞額署山東巡撫事務精明嚴刻者既加以精明之譽復加以嚴刻之譏此皆由於塞楞額莅任以來實心辦理數事而宵小之人不得自便其私故造作此語遠近傳播欲使塞楞額聞之怠其整頓積習之心且使衆人聞之阻其急公効力之念也試問塞楞額所辦之事歷歷可指何者過於嚴刻如山東當日捐納羨餘銀兩各官分用之項黃炳議於蔣陳錫一人名下著追塞楞額奏請分析確查以清多年未

結之案此可謂之嚴刻乎何國宗等奉差山東其所支用盤費俱係地方公項塞楞額有察核之責不得不據實奏聞亦可謂之嚴刻乎濟南倉穀減價平糶以濟貧民而經歷石為壩任意濫賣與射利之徒塞楞額叅劾究問此亦可謂之嚴刻乎葛斗南詳稱鹽院馬立善有索取鹽商銀兩之事塞楞額奏聞請旨此亦可謂之嚴刻乎蘇努之子魯爾金係獲重罪之人今免死安置山東輒敢縱容家人出入無忌塞楞額畧加管束此亦可

謂之嚴刻乎山東虧空流抵一案展轉拖延多年莫結
塞楞額請將經手官負內現任者於任內著追候補者
於補官之日著追革職告休病故者懇恩豁免此亦可
謂之嚴刻乎况朕以公平之道用人行政臣下若有嚴
刻之心朕無不洞察切加訓誡令其悔改又豈肯容臣
下行嚴刻之事乎即以朕近日之政事畧舉數端言之
李衛叅奏李維鈞將僕婦為妻一事朕謂其過刻不合
大體諭部不必議覆此尚可謂朕喜嚴刻乎傳敏奏稱

湖廣鹽規銀兩先經楊宗仁裁去而後任各官暗中收受部議請令一一查叅朕降旨寬免此亦可謂朕喜嚴刻乎趙宏燮名下應追銀兩未完該撫石文焯請將伊子世職革去以便嚴追朕特降旨豁免此亦可謂朕喜嚴刻乎陝西省違旨捐解俸工銀三萬餘兩該撫請於胡期恒諾穆渾等名下追出入官朕以此項既不給還本官本役則不必復行追取此亦可謂朕喜嚴刻乎凡文武官員始初被叅之時草職發審者及審無情弊該

部往往以已經革職無庸議具奏朕俱再三詳察恩准開復此亦可謂朕喜嚴刻乎四川省教官胡鎔等誤將生負造入病故冊內該撫請將教官革職究問朕察其無弊特予寬宥此亦可謂朕喜嚴刻乎兵部議稱大同太原二鎮防汛兵丁若有酗酒賭博者將專汛魚轄等官定以革職降調朕原情度理特令改輕此亦可謂朕喜嚴刻乎又兵部以都統綽奇等奏摺遺漏列名將都統綽奇副都統馬蘭泰董吉納三人議以革職交刑部

朕以其議處太重特降諭旨切責此亦可謂朕喜嚴刻
乎范時繹以南匯縣失盜一案文武官所報人數不符
遂以知縣勒減盜數題請革職將臬司一並叅劾朕以
失盜之初豈能確定人數諭令詳查此亦可謂朕喜嚴
刻乎又如吳禮布叅劾誤班之章京夸岱叅劾誤班之
侍衛朕俱曲體其情而寬恕其過此皆可謂朕喜嚴刻
乎其他與此相類者不可勝數朕嘗言治天下之道用
恩用法務得其平夫平者即聖人之所云因物付物故

謂之嚴不可也謂之寬亦不可也如人言塞楞額精明
嚴刻此四字即自相矛盾既云精明則所懲治者必當
其罪安得又有嚴刻之誚乎倘為人臣者廢國家之法
以博寬大之稱聽無稽之言遂改其供職之素則因循
苟且國家之事必致廢弛而造作浮言者將自謂得計
益肆其伎倆而無所底止矣朕因偶有所聞故將其中
情弊指出曉諭爾等知之特諭

雍正五年四月初八日奉

上諭從來為政在乎得人書曰野無遺賢萬邦咸寧蓋賢才登進在位者多則分猷効職庶績自能就理而民生無不被其澤也朕即位以來加意旁求凡所以延訪擢用之道無不備至如現任官員及候補候選科目諸人每特令薦舉遴選引見廣開錄用之途冀收羣策之力又念各省學校之設原以養育人材爰命學臣保舉賢能升聞於朝以備任使乃直省學臣所舉人數不多又或草率塞責不能副得人之實夫十室之邑必有忠信

古者取人之法惟鄉舉里選合於三代之制今直省府州縣學貢生生負多者數百人少亦不下百餘其中豈無行誼醇篤好修自愛明達之士乎著州縣官會同各該學教官將府州縣學之貢生生負內居家孝友行已端方才可辦事而文亦可觀者秉公確查一學各舉一人於今年冬底申報該上司奏聞請旨其或僻遠之地中學小學實無可舉者令知縣教官出具印結該督撫查實奏聞朕因廣攬人材舉此曠典所以黜浮華而資

實用州縣教職等官為一方師長選賢薦能乃其專責
倘敢有輕忽之心虛應故事濫舉非人者定照溺職例
革職若或徇情受賄則又當重治其罪八旗之滿洲蒙
古漢軍亦照此例將人品端方通曉漢文者著該佐領
各舉一人如不得其人之佐領亦具印結令該都統彙
齊奏聞請旨庶使潛修篤行之士得以表見而國家亦
收得人之效矣特諭

雍正五年四月初八日大學士九卿等奉

上諭今日為佛誕之期恰遇西洋國使臣上表稱賀兩事適然相值故於在廷諸臣奏事之暇偶將朕意宣諭爾等知之向來僧道家極口詆毀西洋教而西洋人又極詆佛老之非彼此互相訛謗指為異端此等識見皆以同乎己者為正道而以異乎己者為異端非聖人之所謂異端也孔子曰攻乎異端斯害也已孔子豈以異乎己者槩斥之為異端乎凡中國外國所設之教用之不足以其正而為世道人心之害者皆異端也如西洋人崇

尚天主夫天以陰陽五行化生萬物故曰萬物本乎天
此即主宰也自古以來有不知敬天之人乎有不敬天
之教乎如西洋教之敬天有何異乎若云天轉世化人
身以救度世人似此荒誕之詞乃借天之名蠱惑狂愚
率從其教耳此即西洋之異端也朕意西洋立教之初
其人為本國所敬信或者尊之如天倘謂立教之人居
然自稱為天主此理之所無者也釋氏原以清淨無為
為本以明心見性為功所以自修自全之道莫善於此

若云必昧君臣之義忘父子之親棄置倫常同歸寂滅更有妄談禍福煽惑凡庸藉口空門潛藏奸宄此則佛教中之異端也儒者守先王之道讀聖賢之書凡厥庶民奉為坊表倘或以詩書為弋取功名之具視科目為廣通聲氣之途又或逞其流言邪說以動人之聽聞工為艷詞淫曲以蕩人之心志此則儒中之異端也即如巫醫二者雖聖人之所不棄然亦近於異端而巫以祀神祇醫以療疾病皆不得不用者至村巫誘人為非庸

醫傷人之命此即巫醫中之異端也安可因其異端有
害於人而不用藥乎不獨此也即一器一物皆以備用
乃位置不得其宜或破損失其本體便成異端矣子疾
病子路請禱子曰某之禱久矣蓋子路之禱異端也夫
子之禱正道也同一事而其中之是非邪正分焉是者
正者即為正道非者邪者即為異端故所論只在是非
邪正之間而不在人已異同之迹也凡天下中外設教
之意未有不以忠君孝親獎善懲惡戒淫戒殺明已性

端人品為本務者其初創設之人自然非尋常凡夫俗子必有可取方能令人久久奉行也至末學後人敷衍支離而生種種無理悖謬之說遂成異端矣與其教有何涉乎中國有中國之教西洋有西洋之教彼西洋之教必不行於中國亦如中國之教豈能行於西洋如蘇努之子烏爾陳等愚昧不法之輩背祖宗違朝廷甘蹈刑戮而不恤豈不怪乎西洋天主教化身之說尤為誕幻天主既司令於冥冥之中又何必託體於人世若云奉

天主之教者即為天主後身則服堯之服誦堯之言者皆堯之後身乎此則悖理謬妄之甚者也西洋人精於歷法國家用之且其國王慕義抒誠虔修職貢數十年來海洋寧謐其善亦不可泯蒙古之人尊信佛教惟言是從故欲約束蒙古則喇嘛之教亦不輕棄而不知者輒妄生疑議乃淺近狹小之見也總之天下之人存心不公見理不明每以同乎己者為是以異乎己者為非遂致互相譏誹幾同仇敵不知人之品類不齊習尚亦

不一不能強之使異亦不能強之使同且各有所長各有所短惟存其長而棄其短知其短而不昧其所長則彼此可以相安人人得遂其用方得聖帝賢王明通公溥之道而成太和之宇宙矣特諭

雍正五年四月十三日管理旗務諸王及滿洲文武大臣等奉

上諭自古人生以節儉為本蓋節儉則不至於困窮糜費則必至於凍餒此理所必然者也本朝滿洲素性淳樸

凡遇出兵行圍俱係自備並無違誤而生計各足近來
滿洲等不善謀生惟恃主上錢糧度日不知節儉妄事
奢靡朕將滿洲等生計時厯於懷從前屢曾降旨諄諄
訓諭但兵丁等相染成風仍未改其糜費之習看來滿
洲等不知節儉多有以口腹之故而鬻賣房產者即如
兵丁等每飯必欲食肉市肉一觔其價可抵數日之蔬
食以貴價市肉而食則一月所得之錢糧不過多食肉
數次即行罄盡矣且口腹有何饜足其每日食肉之人

猪肉既厭必又更思別味如此每月不計出入隨得隨費以致失其生計且又將每季米石不思存貯備用但囤數日之肉食違背禁令以賤價盡行糶賣沽酒市肉飲食至於無餘則闔家匱乏彼時欲食無糧欲服無衣凍餒交迫仍自誇張謂我從前曾食美物曾服鮮衣並不悔悟所以致此困窮者乃以美食鮮衣之故也況飲食俱由習慣而成縱食美物不過一飽而已其他並無善處也現今肉價每觔值錢百文而貧乏之人仍復勉

強買食若使衆人稍知儉約不每日買食則肉價自平
可以賤價而得且兵丁等豈能每日皆得美食至食空
飯之時不能下咽必又不免於餒額咨嗟夫以

上天所賜之飯食乃不欣然食之反以無肉為怨必致孽及
其身而減其福祿今漢人謀生尚知節儉雖殷實之家
而每日肉食者甚少其貧乏之人逐日謀食僅堪餬口
若滿洲等果能節儉各視其分節於肉食每飯惟用蔬
菜將每月所得錢糧少使留餘則日久習成生計自裕

產業可立矣。或有不肖之輩，不守本分，妄行糜費。既至貧乏，惟希恩賞從前。

皇考之時，軫念兵丁効力行間，致有債負。曾發帑金五百四十一萬五千餘兩，一家獲賞俱至數百。如此賞賚，未聞兵丁等置有產業。生計滋益者，悉由妄用於衣食。徒令貿易之人得利。一二年間，蕩然無餘。心愈奢侈，而生計較前反加窘乏。其後又發帑金六百五十五萬四千餘兩，賞賜兵丁人等，亦如從前。立時費盡。朕自即位以來，

除特行賞賜外賞給兵丁一月錢糧者數次每次所賞需銀三十五六萬兩此銀一入兵丁之手亦不過妄用於飲食不及十日悉成烏有亦何裨益且庫帑俱係國家之正項天下百姓之脂膏豈可無故濫行賞賚以累百萬之帑項徒供伊等數日口腹之費乎若不將滿洲等不論多寡隨得隨盡之惡習令其改除朕即有施恩之意亦不可舉行爾等豈不知之兵丁等果將朕訓諭之意曉然明晰實心遵行痛改妄行糜費之習咸各崇

尚滿洲儉約之風節用以謀生則生計自遂朕加恩賞
賜衆亦可得永遠均沾優然樂業矣若邀天眷佑衆皆
勉遵朕諭感戴歡欣常加淬勵至生計各遂之時始知
朕所以愛養滿洲之恩為至深且切也至於人之榮辱
俱係於行止並不在於衣服飲食乃習俗既侈人不以
妄用過費者為非反以節儉謀生者為鄙吝而譏誚之
斯皆由平時之惡習既成以至難於更改也今使衆人
如夢初覺如醉初醒惕然省悟將此越分妄費之人衆

人皆鄙薄之則奢侈者亦必自止矣即王大臣等亦宜各從儉約以為下人之表率蓋在上該管之人如此行之則在下兵丁人等必皆效法知改即一時不能盡改而彼此交相勸勉行之既久自可挽此惡習兵丁等果能各知儉約節用錢糧預計將來思立產業則風俗漸成而生計饒裕不至有窮困之憂矣朕視滿洲最為關切乃國家之根本非其他所可比朕知之既深豈有不教之理且朕自即位以來衆人有論朕為太嚴者斯亦

由朕欲衆人痛改惡習進於善良止其奢靡使知儉約
教育衆人俾得生計凡朕意慮所及之處悉申禁令而
不肖匪類不得肆行其意故妄加議論即如朕曾降旨
禁止飲酒酒者甚非善物飲之過多則能亂性因醉後
鬪毆而遭罪譴者往往有之酗酒之惡無人不知將此
禁止可以謂之嚴乎又曾降旨禁止賭博因賭博而破
產者非止一人從未聞有以賭博致富者即使賭博能
勝其損人利己之物亦斷無滋益之理且例有治罪之

條此特欲使衆人不失生計不干罪譴而禁之也又可
謂之嚴乎又曾降旨禁赴園館行走奢侈之人延請賓
客往赴園館一次即費數金兵丁人等有何產業如此
過費何所恃以為生若惜此銀兩以養妻孥足支一二
月之用此特欲止其妄費以裕其生計而禁之也又可
謂之嚴乎又曾降旨禁止鬪雞鷓鴣蟋蟀之戲此等皆
係無用之物一耽此戲則荒費正務徒費心思雖家道
殷實閒散之人亦應學習文武技藝若耽於此戲以身

為鬪鷄鷓鴣等物所役使有何裨益以此戲為賭具致有破壞家產者其害更甚於賭博此特欲滿洲等罷無益之戲習於為善而禁之也又可謂之嚴乎又曾降旨禁止訛詐盜竊者夫訛詐盜竊之事良善之人斷不肯為俱係妄亂之輩所行之事此特欲使惡人知儆良善獲安而禁之也又可謂之嚴乎又曾降旨禁止僱人當差兵丁人等身既為兵領受錢糧則當差行走習學勞苦俱伊等分所當然理宜遇事向前勉力當差諸事習

練乃有不肖之徒安於懶惰將銀僱人代為服役致誤
差使罹於罪戾習成懶惰耗費錢財毫無裨益之處將
此禁止又可謂之嚴乎又曾降旨禁止兵丁不許妄行
賣米給與兵丁人等米石者原欲其養贍一家老幼也
乃有不肖兵丁但思食用貴價好物將所得米石賤價
糶賣以至下月即有缺米者此特欲使旗人舉家不至
乏食而禁之也又可謂之嚴乎又曾降旨禁放印子銀
兩坐扣錢糧此等借放印子銀兩之人既經借給兵丁

將每月錢糧盡行坐扣一任兵丁之家有何急務並不
一月放寬徒令放銀之惡棍得計於兵丁毫無益處此
禁止借放印子銀兩特欲使兵丁人等得其利益也又
可謂之嚴乎又曾降旨禁典錢糧米石夫錢糧米石係
兵丁終歲所恃以為生者乃有不肖之人賭博妄費以
致拖欠負債無力償還將錢糧米石賤價典當與人若
行禁止則兵丁每季得米每月得銀足以養贍其妻子
此特欲使滿洲等不至於饑寒而禁之也又可謂之嚴

乎又曾降旨禁令喜喪等事不許妄費衣服各按品級
夫貴賤有等服用有制越分服用不徒無益而家產亦
盡耗於無用之地如奢侈者既經禁止則守分者自不
強相效倣此特欲衆人罷糜費之習俾生計從容而禁
之也又可謂之嚴乎又曾降旨禁用黃銅器皿夫制錢
乃係國寶因其價昂於衆無益故行禁止今錢價既平
衆人皆獲利益此特欲使兵丁用銀兌錢可以多得而
禁之也又可謂之嚴乎又曾降旨禁止因公科派夫兵

丁人等惟恃每月所得錢糧養贍妻子乃有無耻之該管官貪假托公事科斂錢糧則兵丁必受其累此特欲使兵丁等皆得全分錢糧而禁之也又可謂之嚴乎又曾降旨禁止鑽營請托夫請託鑽營之事必致背理犯法不惟是非顛倒而不肖之人不過徼幸於一時亦終不能免於罪戾此特欲剔除弊端使諸事就理而禁之也又可謂之嚴乎又曾降旨禁止臣工不可貪黷蓋官貪既肆其貪婪則下人必至於窮蹙豈惟有玷官箴亦

且干冒國法如臣工等果皆廉潔則所屬多獲其益此特欲使各守官箴而禁之也又可謂之嚴乎又曾降旨禁止要結朋黨夫結黨之人乃國家之亂臣賊子若不嚴加禁止一經事發必致多所殺戮若衆人知懼果能悛改非惟可保其身亦得全其家產此特欲曉諭衆人使罷朋黨之習以免於誅戮而禁之也又可謂之嚴乎凡係朕所禁止諸事悉為兵丁等身家計也此內何事不宜禁止且於朕躬有何關礙之處乃衆人雖生怨論

而猶如此諄諄訓誨不已衆人咸應體朕苦衷何得更
有怨言此皆係不肖妄亂之人不得肆行其意妄謂法
令過嚴耳其守分畏法方正之人法令雖嚴於伊何礙
且凡此禁止之條咸係

皇考從前禁止之事並非創始於朕但當時之臣工未能實
意奉行開導訓諭所屬之人是以一應惡習未得盡改
今朕特為兵丁生計不時令王大臣等教以節儉禁其
奢靡訓誡諄諄而王大臣官員內仰體朕旨加意奉行

者不過十居其五其餘大半尚未愜朕懷而無知之人
遂論以為過嚴設使大臣等咸各遵照朕旨竭力嚴加
訓飭則奸惡之徒又不知作何妄論矣如欲使若輩稱
為寬仁之主何難之有但不加管教任其酗酒賭博出
入園館以及種種糜費妄亂之事俱令得行則若輩必
稱朕為寬仁之主矣然此不但朕不能遂其不肖之念
如坐視滿洲等漸流至於不得衣食毫無顏面之時即
以國家全力養贍伊等亦且不能給足朕意實有所不

忍勢亦必不可也朕今因兵丁食肉之故降旨訓誡想無知之徒必又云既已禁止我等不穿紗帛不飲酒醴不入園館不用銅器不賣米石今又禁至於食肉矣如此妄言者勢所必有然朕亦笑而聽之耳要不過頑劣無知之人肆行怨謗若稍有知識者必以朕屢念伊等生計訓諭至於飲食微細之事而生感也斷不至有怨言且此等無知愚昧之言與孩童怨其父師管教之嚴相類及至成人為官之時始知父師嚴加教育之恩也

今豈因一二愚蒙妄論之故朕即不加教訓聽其底於窘迫之理乎即此等奢靡頑劣之徒雖懷怨望之念今見朕為伊等生計再三開導訓諭倘能反復思之亦可回其不肖之心而進於良善爾等其仰副朕厯念滿洲等生計之至意各將所屬官兵及閒散人等剖晰情理不時詳加訓誡特諭

雍正五年四月十五日管理鑲紅旗滿洲都統事務多羅果郡王允禮等以寧古塔防禦負缺將該將軍

保送之驍騎校阿什泰擬正本旗前鋒校五雅圖擬
陪帶領引

見奉

上諭將擬陪之前鋒校五雅圖補授寧古塔防禦賞給銀
五十兩嗣後八旗有黑龍江船廠等處貪缺若自京補
授前往者不必論其品秩俱照此例賞給盤費銀五十
兩特諭

雍正五年四月十五日漕運總督張大有因伊姪張

景澍補授江川縣知縣具本謝

恩奉

上諭朕之用人隨材器使悉秉至公未嘗因大臣子弟而有所偏向之處乃大臣等常因兄弟子姪及同族之人簡用陞遷具奏謝恩是將國家用人授官之公事而視為感恩戴德之私情愚人無知或至妄生疑議且恐不肖子弟自謂有所倚仗而生縱肆之心非所以教之也朕方禁止天下之夤緣請託似此顧瞻子弟之意即開

夤緣請託之端况人品之賢否甚難保信在父子之間
尚有休戚相關之意自然遵其教訓其餘族黨之人每
多貌合而心離者何必為此虛文以互相牽累乎惟有
各人黽勉自盡其道之為善嗣後大臣等父子受恩者
准其奏謝若因叔姪兄弟族黨簡用陞遷奏謝者俱著
停止特諭

雍正五年四月十九日奉

上諭昨鄂爾泰楊名時以黃河澄清具本慶賀並謝加級

之恩二人本章皆不合定式經通政司題叅朕於鄂爾
泰則免其查議於楊名時則交部議處兩人同一錯誤
其本章又同日進呈而朕之降旨各異外間之人必私
相擬議以為有所偏向也不知朕之待人悉本至公而
觀人必於其素不以一事之偶差而掩其衆善亦不以
一端之偶善而蓋其衆愆或為有心之過或為無心之
失朕無不悉心體之或過小而情不可恕或過大而情
有可原或同一錯誤而在彼則不可恕在此則有可原

朕皆竭盡心力加詳察焉總之物來順應視乎其人之
自取朕總不立成見於中故以為無定而實有定以為
有定而又無定所謂因物付物以至公之心行至當之
理而已鄂爾泰公忠體國其辦理之事陳奏之言悉本
至誠愷切之心以為事君之道此等純臣求之史冊亦
不多覩故其本章錯誤之小節朕不但不忍加以處分
並不忍發與部議至於楊名時巧詐沽譽朋比欺蒙從
不實心辦事毫無親君愛國之心與鄂爾泰相去霄壤

今若因恕鄂爾泰之事而並寬楊名時之過則賞罰不當於朕公平待下之道轉失之矣恐庸人不知朕心妄生疑議故特曉諭知之若內外諸臣欲邀朕之恩避朕之罰總在平時自為而已如果公忠體國之臣即使朕或不明賞罰倒置

上蒼昭昭在上亦必鑒照不爽也自省之道期共勉之特諭
雍正五年四月二十一日三法司衙門將用刀戳死
在鄉居住鑲黃旗閒散人方冬魁之順義縣民張四

擬絞具奏奉

上諭方冬魁乃旗下閒散人而居鄉者必係懶惰無用之人理宜安分居家今因飲酒沉醉見張四不曾讓坐遂恃強詈罵扭打以致張四情急刀戳殞命向來居鄉旗人倚恃強力欺凌民人者甚多即方冬魁之事可見著將張四免其死罪枷號兩個月責四十板從輕發落以為旗人不論道理恃強陵弱欺壓民人者之戒著通行曉諭八旗及各處屯莊居住之旗人咸使聞知特諭

雍正五年四月二十三日奉

上諭治天下之道在於用人今日刑部堂官塞爾圖等保舉筆帖式一人陞補主事朕問其在部辦事幾年則對曰在部三月又問其所以保舉之由則曰因伊坐臺十二年是以舉之朕令內外各衙門遴選人員者原期官得其人人稱其職使吏治民生均收實效也況刑部為民命所關朕尤加意慎重惟恐用人不當使刑罰偶失其平干

天和而枉國法此意乃舉朝所共知者若大臣等能體朕意秉公去私則所舉之人各稱其職不但國家之事皆辦理得宜且衆人觀感鼓勵盡心職守而貽誤曠官之患與鑽營傲幸之弊俱可除矣今塞爾圖等以朝廷量能受職之典視為用情市恩之地此等事不過身受者一人感激而已而欲有益於國家之事生衆人鼓勵之心豈可得乎朕嘗為吏治延攬人材而諸臣之薦人也或稱其文學優長或稱其居家孝友夫優於文學者僅可

以膺翰墨之司而居家孝友者國家自有旌揚之典倘因其所長而用其所短不幾因其所短而並累其所長乎天下之人無不誦法孔子試思孔子為政三月而魯大治則孔子豈無實政及於民生哉朕治天下用賞用罰悉秉至公夫賞所當賞則在朕並非加恩而受之者亦不必存私感之念罰所當罰則在朕並非用威而受之者亦不當懷怨望之心凡受恩而生感者即受罰而生怨者也施恩而喜人之感激者即用罰而懼人之怨

望者也然則喜人感激則將日日施恩而懼人怨望則將置法度於不用乎孔子為政之初尚有麇裘之謗愛憎之口何足為憑在大聖人且不免況其他乎孔子曰不如鄉人之善者好之其不善者惡之然則天下之大不能無不善之人即不能無怨望之人得不善者之惡豈不愈足以彰吾之善見吾用法之公乎且古人云任勞任怨則不但不避人之怨且以一身直任之而不推諉於他人夫以朕之才智而又居至尊之位若潤色粉

飾使天下人人感頌乃至易之事然虛假以沽名優柔
以貽患朕不肯為亦不忍為也夫父母之於子未有養
而不教者亦未有不教而可謂之愛其子者朕視天下
臣民皆吾赤子安忍有苟且姑容之意而不教之以正
乎塞爾圖等身為大臣乃庶官之表率今存卑鄙狹小
之見既欲市賣私恩則必迴避嫌怨似此市恩避怨之
念全是私心即作威作福之所由來也此風斷不可長
是以特行宣諭令內外臣工咸以為戒特諭

雍正五年四月二十九日管理旗務王都統內務府
總管等奉

上諭直隸州縣緝拏逃盜每每踪跡察訪至內府莊頭之家而莊頭等護庇不令捕役進家搜捕以至直隸逃人盜案不能絕踪此皆由內府莊頭藏匿之故再八旗在屯居住人等多係不思上進怠惰浮薄之輩在屯閒居不守法度竟有窩藏逃盜欺陵百姓好事妄為者此等內府莊頭並在屯與民人雜處之旗人若不嚴加約束

必至妄生事端八旗都統內務府總管等行文直隸總督及巡察御史嗣後內府莊頭及鄉居旗人家中有窩藏逃盜者地方官差役搜捕有抗拒者即將窩家一併拏究再或有不守本分酗酒生事妄為者該地方官即行詳報總督若係旗人由總督移咨該旗係內府莊頭移咨內務府該旗及內務府將應行辦理者即行辦理應行拏送者即行拏送其總督移咨事件每月彙題一次以備朕之詢問其移咨爾等事件若有遲延以致違

誤者將爾等治罪若地方官徇隱不行詳報總督或已
詳報總督而總督不行移咨各該管處者被巡察御史
查出題叅將不行詳報之州縣及不行移咨之總督一
併嚴加議處巡察御史徇隱不行查叅或別案發覺或
經朕訪聞務必重治其罪如此立法則內府莊頭及居
鄉旗人各知警戒畏法守分而直隸地方窩藏逃盜之
弊可清於鄉居旗人百姓亦大有裨益矣特諭

雍正五年五月初四日奉

上諭前織造等衙門貢獻物件其所進御用繡線黃龍袍增至九件之多又見燈幃之上有加以綵繡為飾者朕心深為不悅比即加以誠諭近因端陽令節外間所進香囊宮扇等件中有粧飾華麗雕刻精工者此皆費於無益之地開風俗奢侈之端朕所深惡而不取也向來外省諸臣凡有進獻方物朕留於宮中服用者所需實係不多每隨便頒賜諸王內外大臣等所以推廣恩澤也如黃龍繡緞之類既不可以頒賜諸王大臣不過收

貯於宮中耳其餘華燦之物在朕用之心中尚覺不安
若賜諸王大臣在伊等亦覺非分豈非費於無益之地
乎況朕素性實不喜華靡一切器具惟以雅潔適用為
貴此朕搏節愛惜之心本出自然並非勉強數十年如
一日者凡外臣進獻惟應量加工價少異於市肆之物
即可見諸臣恭敬之忱何必過於工巧而後見其誠悃
乎工匠製造之情喜新好異無所底止見一美麗之式
樣初則競相慕效後必出奇鬪勝以相誇此雕文纂組

之風古人所以斥為奇袤豈可導使為之而不防其漸乎蓋治天下之道莫要於厚風俗而厚風俗之道必當崇儉而去奢若諸臣進獻之物以奢為尚又何以訓民間之儉約乎朕觀四民之業士之外農為最貴凡士工商賈皆賴食於農以故農為天下之本務而工賈皆其末也今若於器用服玩之物爭尚華巧必將多用工匠以為之市肆之中多一工作之人即田畝之中少一耕稼之人此逐末之所以見輕於古人也且愚民見工匠

之利多於力田必羣趨而為工羣趨為工則物之製造者必多物多則售賣不易必至壅滯而價賤是逐末之人多不但有害於農而並有害於工也小民舍輕利而趨重利故逐末易而務本難苟為官者遽然繩之以法必非其情之所願而勢有所難行惟在平日留心時刻為之勸導使小民知本業之為貴又復訓飭閭閻崇尚樸實工作之間不為華巧如此日積月累遂成風俗雖不必使為工者盡歸於農然可免為農者相率而趨於

工矣至如士人所業在乎讀書明理以為世用故居四民之首然父兄之教子弟亦當觀其才質如何若果穎悟恂謹可望有成則當使之就學而為士若愚濁中下之資讀書難通即當早令改業歸農使之盡力於南畝以為仰事俯育之資誠恐讀書不成而又粗識數字曠廢閒遊必致非分妄為越禮犯法是浮慕讀書之名而不得其道其傷農而害本者為尤甚亦不可不知戒也朕深揆人情物理之源知奢儉一端關係民生風俗者

至大故欲中外臣民黜奢賤末專力於本人人自厚其
生自正其德則天下共享太平之樂矣昔人云由儉入
奢易由奢入儉難不知奢者取用少而費力多儉者取
用多而費力少則由奢入儉乃人人行之甚便者不可
謂難也朕自身體力行爲天下先諸王內外大臣文武
官弁與鄉紳富戶當深體朕心欽遵朕諭期共勉之勿
視爲具文特諭

雍正五年五月初九日奉

上諭制錢為國家之寶兵民之要用乃每年鼓鑄而錢文並不見增錢價亦不見平必有奸偽之徒希圖獲利將制錢銷燬製造器皿售賣者因此特降諭旨禁止造用黃銅器皿或無知之人不曉朕以愛惜兵民之至意為此有益於衆之舉反謂將伊等所用之銅器一槩收禁而妄行議論者未必無之夫禁此黃銅器皿者並非內府有所需用及製造器皿之處且亦並非無為而收特欲令錢價得平以資天下兵民之生計故也從前各省

解送銅觔乃不由本省將銅前來攜銀至京買銅而交
奸偽之徒希圖獲利將制錢銷燬賣於伊等而交者有
之否則將錢銷燬製造黃銅器皿而賣者有之若非如
是錢文何以不見增加現今總無順治時錢即康熙制
錢亦覺甚少由是觀之奸徒將制錢銷燬之處甚屬顯
然朕曾屢降諭旨近者步軍統領衙門將銷燬制錢之
人拏獲一夥今內務府衙門又拏獲一夥與朕旨若合
符契衆亦曉然共悟矣但若輩尚係小夥必有大夥未

經拏獲伊等或被拏獲或恐懼而止無燬制錢之人則
錢價自平矣元年以銅少錢價未平之故朕即欲禁止
造用黃銅器皿因隆科多奏稱若將黃銅禁止恐致紛
更且不能行朕是其言而未令施行今禁止黃銅器皿
未久已覺錢價漸平自此以後不過數年之間錢價必
平至於兵民生計著有成效之時衆人始知朕為兵民
禁止黃銅之本意也將此徧行曉示八旗五城內務府
特諭

雍正五年六月初八日奉

上諭倉場米石乃國家第一要務關係最為重大試思此項米石民間輸納何等辛苦官負徵解何等煩勞且糧艘運送京師何等繁難一顆一粒皆當愛惜不忍輕忽朕為此一事宵旰焦勞時時切加訓飭至再至三且曾降旨令修理倉廩等項不惜多費帑金務期完固此臣民所共知者托時陳守創身為倉場侍郎自當仰體朕心悉心料理使倉廩堅固天庾充盈不致霉爛乃為稱

職昨朕特遣大臣等前往查看則見京通各處倉廩屋
瓦滲漏牆壁損壞者十居八九所貯米石漸至潮濕霉
爛夫以如珠如玉之米糧而視為泥沙之棄擲忍心害
理莫此為甚若不嚴行稽察無以儆怠忽而清弊端在
京十倉每倉或都統或副都統各派一員御史中不論
滿漢每倉各派一員專任稽察之責其米石出入支放
奏銷事件不必經管仍屬倉場侍郎管理其房屋滲漏
牆垣損壞與倉內鋪墊及匪類偷竊一切情弊俱交與

派出之都統副都統御史稽察遇有查出之處即行知倉場侍郎若倉場侍郎等不即辦理妥協敢致遲延著派出之都統副都統御史奏聞倘有應行查出之處不行查出則將缺少米石應賠之項著落倉場監督等官與派出之都統副都統御史分賠其通州三倉即照此例交與通永道通州副將稽察其失察分賠之處亦照依京倉施行特諭

雍正五年六月十九日奉

上諭都統副都統等引見人負往往進退參差班行不整
朕教導指示約二三十次而希爾根范時捷此次實出
有意違玩非尋常失儀可比希爾根著革職從寬留任
至於范時捷乃年羹堯門下鷹犬年羹堯稱其才品超
羣滿漢官員無與比並及年羹堯事敗其案內牽連范
時捷之處甚多朕俱不行究問且念其為勲臣之後仍
畀以都統重任料伊自必感朕深恩力圖報効乃歷年
以來見其辦事昏庸奏對糊塗並無絲毫効力一事可

取之處揣范時捷之意或以朕處治年羹堯之故觖望於心不肯黽勉亦或才具本屬不及向因工於諂媚故年羹堯揄揚太過乃至今日底裏畢現耶范時捷著草去都統在侍衛上行走令領侍衛內大臣請旨朕非因偶爾失儀一節處分大臣特降此旨諭衆知之特諭雍正五年六月二十一日刑部議將拖欠錢糧逾限未完四格之房產入官擬以枷責具奏奉

上諭四格既有可抵之房產其枷責著行寬免嗣後凡係

入官房產所變價值較原欠之數有餘出者該旗查明
將餘出銀兩給還本人特諭

雍正五年七月初四日奉

上諭今日旗下大臣奏稱馬武家人普大藏匿隆科多銀
兩擬以枷號鞭責等語隆科多銀兩與馬武家人何涉
乃公然敢為隱匿該旗止擬以枷責完結明係瞻徇情
面朕已諭令改擬具奏矣伊等倘謂馬武生前効力有
年欲為原諒亦祇可施之馬武本身何得並免其家人

之罪耶從前屢降諭旨令文武大臣各將家人嚴行約束無得聽其朋謀結黨串通生事反覆訓誡至再至三無如漸染既久積習尚未盡除凡屬旗人一入大臣之列即有一出名之管家內外傳播諸大臣之管家即於同類中輾轉糾合彼此相邀飲酒唱戲結黨營私各將主人百般引誘黨與之結大槩多由此起入伊等之黨者則於伊主之前將入伊黨之主人稱揚贊美令其主人亦互相交好成黨不入伊等之黨者則於伊主之前

將非伊黨之主人離間陷害令其主人亦互相傾軋成讐夫家主果念家僕出力欲加撫育之恩亦祇宜於家門之內加意思養何必縱容結成黨與以伊等之好惡為從違乎如此則大臣等非驅使奴僕直為奴僕輩所驅使耳況縱僕在外招搖生事實為可耻何得轉以為榮及至劣跡敗露爾等為其所累誠何苦乃爾耶家僕結黨雖屬細事此風關係匪輕嗣後文武大臣等嚴行約束家僕實力稽查務使各安本分勿得縱容結黨倘

仍前玩忽不加嚴禁致復有結黨生事妄為者經朕聞知必將此等惡僕即行正法著通行傳諭八旗以及內府佐領咸使知之特諭

雍正五年七月初四日奉

上諭齊蘇勒嵇曾筠奏報伏汎疏內稱頌之語俱有洪福齊天河伯効靈字樣朕敬

天祀神至誠至恪如齊天宇樣實為越理即効靈字樣朕覽之心亦不安嗣後內外臣工本章內將此等祝頌之語

通行禁止特諭

雍正五年七月初五日奉

上諭昨塞爾圖等議奏隆科多菩薩保不法一案悖謬之極塞爾圖素性濫交生事凡屬重案多有牽連如年羹堯蔡珽之案伊俱需染朕皆從寬不行深究今伊又袒護隆科多徇私枉法情弊顯然此等背理之事豈能在朕前欺誑乎凡當日

聖祖仁皇帝屏棄不用之人如阿其那鄂倫岱噶爾弼法海

額爾金能泰塞爾圖等朕即位以來念伊等皆歷練事務之人故復任使冀其自能洗心滌慮以贖前愆豈知伊等下愚不移有過而不知改有恩而不知感任用未久諸事敗露干犯王章仰見

皇考知人之明洞察其隱微而豫知其終身也似此下愚不移者甚多難以枚舉朕之知人實不及

皇考之萬一中心愧服今因塞爾圖之案將朕心抱慚之處諭令諸臣知之特諭

雍正五年七月初十日奉

上諭七月初一日朕曾頒諭旨云從來天人感召之理捷於影響凡地方水旱災祲皆由人事所致或朝廷政事有所缺失或督撫大吏不修其職或郡縣守令不得其人又或一鄉一邑之中人心詐偽風俗澆漓此數端者皆足以干

天和而召災祲是以朕諄諄訓敕頒發諭旨至再至三而宵旰之時無刻不深乾惕但天下至大兆民至衆察吏之

責莫如督撫親民之官莫如守令若地方有司官果能
視民如子休戚相關平時化導有方痼瘼一體則民氣
舒暢而乖戾潛消設偶遇雨暘愆期又復為民請命虔
誠祈禱自可挽回

天意感召休和如張堪之麥秀兩岐魯恭之蝗不入境史冊
所傳皆實有其事實有其理非虛語也近見有司官平
時不能盡愛養之道民生不厚民俗不淳既足上千

天譴及遇水旱又漠不關心不知悔過自省縱事祈禱虛文

亦不過勉強塞責甚至不肖之員惟恐報灾蠲賦已身
不得火耗羨餘而隱匿不報者有之又或本身原有虧
空轉冀水旱得邀賑濟以便開銷而百姓並不沾顆粒
之惠者有之似此居心行事竟將民生疾苦視同陌路
則民氣鬱而不舒何以弭天灾而召豐穰乎朕為天下
主凡民生之休戚吏治之得失皆朕躬之責亦難推諉
於臣工況臣工之是非即朕之是非朕又何能推諉乎
若言可推諉即近在京畿地方亦府尹刑部之責言不

可推諉則雲貴邊方之事亦朕視同畿內一體辦理之事也如何分得近遠用人察吏之道各有等次朕所察用者督撫也督撫所察用者有司也若督撫不得其人朕之過也有司不得其人則督撫之過也至地方百姓不能為之遂生復性捍患禦災則其過專在有司矣夫為政之道在於得人而用人之法只得博採輿論然使但以輿論為憑則如裴率度張楷人皆稱其秉公持正謹慎和平及至近日江西虧空畢露弊端種種皆裴率

度張楷任內之事伊等從前肆其巧詐苟且因循貽害地方其罪實難寬貸至如河南巡撫田文鏡者尚有天理良心喪盡之李紱謝濟世等誣為貪婪如此不辨公私顛倒是非實可為歎息流涕朕御政五載如此者不可枚舉只就田文鏡裴率度兩人言之則輿論之不足憑顯而易見矣輿論既不足盡憑則人之賢否何由而知只得試用之以觀其後此即古聖人明試以功之意若試之而稱其職豈非朕心之所樂願倘試之而不稱其職

自當速行更換豈有劣負既經敗露尚可姑留在任乎
乃無知小人不知朕進退人才之苦心而輒有輕於去
留之私議此則愚昧之甚者也如田文鏡在任五年朕
因其有益於地方屢欲用為總督尚不忍令其輕去豫
省裴率度在任一無善狀朕惑於輿論姑留至於三年
以致江西吏治廢弛至此至今朕心悔不早去尚可謂
朕之用人輕於去留乎為督撫者當體朕察吏安民之
苦心竭誠秉公為國倡率百僚使地方有司皆能實盡

父母斯民之道則上與下合為一心官與民聯為一體和氣致祥休嘉日集斷不至旱潦之為憂矣今年春月直隸地方有數處少雨朕心軫念不遑寧處降旨詢問而總督宜兆熊劉師恕坦然奏稱今歲閏月此後得雨亦不為遲朕已降旨切責如此存心急忽豈能感召

天和從前雍正二年春河南地方少雨田文鏡具摺奏聞詞意懇切憂民之心露之章句朕覽奏為之心動竭誠祈禱乃伊摺奏到京之二日河南即得大雨朕先亦曾明

諭自此以後三年之內豫省皆獲豐收連歲穀秀十三穗麥秀三岐可見至誠感格無有不應凡封疆大臣皆能如此存心則地方斷無不受福之理田文鏡當加殊恩以獎忠誠任事之大臣著加兵部尚書銜授為河南總督總兵以下聽伊節制此係特恩不為豫省定例朕意各省地方莫要於水旱之事當定為地方官之考成除直隸之玉田寶坻等處江南之泗州盱眙等處湖廣之江陵沔陽等處廣東之圍基等處皆濱江近河素稱

沮洳之地似此等地方難以定議外其餘地方官負倘有政治不修化導不力以致民氣不舒灾侵見告者或有自顧已私匿灾不報者應作何嚴加處分之處著大學士九卿詳議具奏如此則人人知敬

天勤民之道矣自古有治人無治法朕所降諭旨丁寧往復無非念切民生然必奉行盡善方收實效即如社倉一事朕數年以來屢屢降旨但可勸民自為不可繩以官法前楊宗仁在湖廣銳於舉行而州縣官遂迎合其意

勉強行之近日竟有官吏將此項米穀侵那者此即奉
行社倉之弊非朕之意也又如民間向來多將膏腴之
壤栽種烟葉以圖重利朕慮其拋荒農務諭令有司善
為勸導使知務本諭旨甚明並非迫令一時改業也今
聞有將民間已種之烟葉竟行拔去者此時既不能樹
藝五穀而已種之物又復棄置豈不農末兩失大負朕
愛養百姓之初心耶朕所降諭旨明白周詳而奉行者
如此舛錯皆係愚劣官貪不能領會且遠鄉僻壤之地

未曾曉諭周知此皆地方大吏疎忽之咎將此諭旨徧傳直省務使遠鄉僻壤咸共知之嗣後凡朕令徧諭之旨倘有遺漏宣示不及之處經朕察出定嚴加處分此乃初一日所降諭旨也乃數日以來陰雨連綿不見晴霽朕甚憂畏虔誠修省細思近日用人行政之處可以自信或因前日頒發諭旨欲將地方水旱定為有司考成之處其事有所不可故

上天垂象以示意耶其以水旱為考成之處不必定例大學

士九卿不必議奏着將前後所降諭旨彙寫一處仍復通行並令大小官員各錄一道存貯官署以自儆省且使知朕敬

天乾惕之至意期與內外大小臣工共勉之其餘仍照前旨行特諭

雍正五年七月十九日辦理旗務王大臣等奉

上諭邇來頻雨想八旗兵丁之房屋牆垣必有倒壞者爾等將戶部庫銀賞給滿洲旗下每佐領一百兩蒙古漢

軍人數較少蒙古旗下每佐領七十兩漢軍旗下每佐領五十兩上三旗包衣佐領渾托和及五旗諸王之包衣佐領俱照滿洲旗下賞給諸王之渾托和下人等不必賞給將所賞銀兩交與各該佐領查屋垣倒塌應賞者賞之如該佐領下無屋垣倒塌者即均勻賞給特諭雍正五年八月初六日領侍衛內大臣公馬爾賽奉上諭善馬射人之額數缺少爾等挑取時於年少大臣官員及宗室公以下之宗室內視其優者挑取其不帶翎

之人著照十五善射例准其帶翎特諭

雍正五年八月二十七日八旗佐領奉

上諭八旗人貲乃國家根本所關甚重養育教誨不可少
懈佐領者乃統轄一佐領之人俾佐領下人等皆不失
生計不染惡俗養之教之使趨於善莫要於佐領爾等
理宜為國家宣力正己率物教育所轄佐領下人佐領
內有原管佐領有世管佐領有公中佐領原管佐領乃

太祖

太宗時爾等之祖或率所部來歸編為佐領令其管理者有之或戰陣有功賞賜人口編為佐領令其管理者亦有之是雖爾等原管之佐領然佐領下人同是滿洲其中亦有從爾等之祖宣力國家得授世職之人之子孫爾等理宜骨肉視之使之成就若自以為原管佐領將佐領下人視同奴隸而陵賤之殊屬非理爾等若倚勢作威心懷私刻行不公平違朕保赤之念豈惟國法不容亦敗汝祖宗勤勞所立之基業矣世管佐領亦因爾等

之祖曾宣力國家或人材可用善於管轄故令其管理
佐領遂世世相傳以至於爾等之身爾等理宜將佐領
下人愛惜訓誨勉盡厥職為國家成就人材念爾祖之
勤勞以永保累世所管之佐領也再管公中佐領之人
特以其能理佐領之事能教佐領下人是以揀選令其
管理益宜將佐領下人教育約束俾趨於善爾佐領等
果抒誠心為國家効力正以持身視佐領下人如同手
足誘掖訓導誠切肫篤則佐領下人無不成就佐領內

事無不辦理矣夫佐領之管佐領下人無異州縣之於百姓如州縣所轄地方或百里有餘或幾二百里戶口人民不下數萬徵糧斷訟事件繁多然猶可為地方興利除弊懲惡勸善俾庶民各遂其生以佐領視州縣誠為甚易一佐領下滿洲多不及二百人少或七八十人計戶不過四五十家世為同里孰守分節儉孰越理奢侈孰孝弟勤學孰妄亂生事諒無有不知者也管佐領之人誠於佐領內之善者獎勸優待薦舉以鼓勵之則

善者益樂為善衆人亦皆鼓舞興起勉於為善矣其劣者亦宜視如子弟開導訓誡初教之不改再則斥辱之誠如此愛惜而訓誨之雖係下愚亦必中心省悟謂此反復教誨之者凡以為我也其必悔前非而趨於善矣倘有賦性頑劣雖行教誨怙終不悛者即申詳叅領都統等懲戒之或送部治罪以警衆人如此則佐領下頑梗之徒咸懼而不敢為非矣管轄人者不能免於人之怨已但當於佐領下奢侈者訓使節儉懶惰者勉使勤

公將頑梗之徒毫不徇縱即有一二無知之人初時未免抱憾久而自悟其所以如此者特以造就伊等俾得遂其生計之故自然漸知感戴矣今佐領內或有不肖之人自恃身為佐領陵虐佐領下人不論是非恣意妄行其或昏懦之輩託為愿人將佐領事盡諉之驍騎校任其所為其或怠惰之人將應行教諭佐領下人之處並不身親其事視為具文但屬之領催轉相傳示其或貪鄙之輩不知愛惜佐領下人反貪小利而朘刻之則

佐領下人何由心服何由成就是以朕今特令每佐領設副佐領一員協同佐領辦事和衷共濟將佐領下人教育約束庶幾於事有益倘副佐領目無佐領不問事理肆行無忌亦屬不合如有此等之人該佐領即申詳都統若佐領與佐領下人結黨目無副佐領朦朧作弊副佐領亦即申詳都統不可彼此瞻徇情面爾等將朕訓旨謹識於心佐領副佐領凡佐領下事務從公辦理一意和同惟理是求各抒誠心將佐領下人教育約束

禁止妄亂賭博酗酒之徒毋使干法亂紀嚴飭怠惰之人使之勤力奉公勸諭奢侈之輩使之崇尚儉樸安分遂生勉習文武之業副朕樂育八旗人材之至意俾凡係佐領下人皆得以成就風俗淳美於以綿子孫無疆之福澤而我朝億萬斯年久安長治之宏規朕可保其無替矣爾等各宜勉旃特諭

雍正五年八月二十八日奉

上諭朕念切民依今歲令各省通行耕藉之禮為百姓祈

求年穀幸邀

上天垂鑒雨暘時若中外遠近俱獲豐登且各處皆產嘉禾以昭瑞應而其尤為罕見者則京師

藉田之穀自雙穗至於十三穗御苑之稻自雙穗至於四穗河南之穀則多至十有五穗山西之穀則長至一尺六七寸有餘又畿輔二十七州縣新開稻田共計四千餘頃約收禾稻二百餘萬石暢茂穎粟且有雙穗三穗之奇廷臣僉云嘉禾為自昔所未有而水田為北地所

創見屢詞陳請宣付史館朕惟古者圖畫豳風於殿壁所以誌重農務本之心今蒙

上天特賜嘉穀養育萬姓實堅實好確有明徵朕祇承之下感激歡慶著繪圖頒示各省督撫等朕非誇張以為祥瑞也朕以誠恪之心仰蒙

帝鑒諸臣以敬謹之意感召

天和所願自茲以往觀覽此圖益加儆惕以修德為事神之本以勤民為立政之基將見歲慶豐穰人歌樂利則斯

圖之設未必無裨益云特諭

雍正五年九月初二日奉

上諭民生日用所需制錢最為切要朕特為便民起見屢頒諭旨嚴禁銷燬制錢並令京城及各省督撫駐劄之省城不許鑄造黃銅器皿三品以下官員及兵民人等不得私用此朕欲期錢文豐裕為小民易於資生非朕有所需用也已曾諄切詳諭不啻再三自曉然於天下矣京城現今奉行錢價已覺稍平乃近聞各處督撫駐

劄之省城銅器店內仍用黃銅鑄造者甚多此明係各督撫奉朕諭旨之後不曾實力奉行只以告示曉諭虛文掩飾而已朕時時切諭內外諸臣若朕所頒諭旨有不便於民之處即當據實敷陳請弛其禁斷不可陽奉陰違有失為政之體各省督撫等寧不聞之乎且朕向因錢局鼓鑄日增而錢文日見短少即灼然知有銷燬制錢鑄造銅器之弊嗣於京城內果屢次拏獲銷燬制錢之奸民而欽差官貢至甘肅地方亦見有燬錢為器

者與朕所料若合符契則黃銅器皿必當嚴禁明矣省會乃督撫駐節之區耳目最近政令易行非若遠鄉僻壤之難於稽察也若果實心遵奉甚屬易事朕為制錢籌畫宵旰焦勞各省地方官辦運銅觔亦甚費經營跋涉之苦然後官局得以鼓鑄錢文以資百姓之用夫以鑄錢如此之難而奸棍貪財射利竟將已成之錢復行銷燬蠹國害民孰大於此故禁用黃銅者所以杜燬錢之源也乃督撫畏一二犯法貪利工商之怨望背朕旨

而輕民計是何心也今特再加訓誡各省督撫務宜實力奉行朕令人於各省查訪倘仍前疎忽定將督撫嚴加處分至於黃銅器皿亦非人生必不可缺之物鐵錫瓦木可以代銅器者甚多朕前諭旨甚明況交官仍得價值又何樂而不為但從前曾斟酌三品以上許用黃銅器皿今猶覺濫用者多嗣後惟一品官貢之家器皿許用黃銅餘著通行禁止如有藏匿私用不肯交官者槩以違禁論中外臣民其知朕意毋忽特諭

雍正五年九月二十八日護軍統領博爾屯將由侍衛補授之副護軍叅領應否帶翎之處請

旨具奏奉

上諭八旗由侍衛官負護軍校補授之副護軍叅領俱令帶孔雀翎特諭

雍正五年十月初五日

召入議政王大臣及九卿等奉

上諭隆科多所犯四十一款重罪實不容誅但

皇考升遐之日召朕諸兄弟及隆科多入見

面降

諭旨以大統付朕是大臣內承

旨者惟隆科多一人若因罪誅伊雖於國法允當而朕心則有所不忍隆科多忍負

皇考及朕高厚之恩肆行不法朕既誤加信用於初又不曾嚴行禁約於繼今惟有朕身引過而已在隆科多負恩狂悖以致臣民共憤此伊自作之孽

皇考在

天之靈必昭鑒而默誅之隆科多免其正法於暢春園外附近空地造房三間永遠禁錮伊之家產何必入官其應追贓銀數十萬以抵追賠之項尚且不足著交該旗照數追完其妻子亦免入辛者庫將岳興阿草職玉柱發往黑龍江當差特諭

雍正五年十月初六日前鋒統領伊爾登鄂善等奉
上諭補授護軍校驍騎校列名人貲倘於引見之時有患

病者不妨少待若為日太久即將其名繕寫綠頭牌入於引見人內聲明情由具奏如此則人可不至於壅滯矣將此傳知八旗都統護軍統領等特諭

雍正五年十月十八日奉

上諭比見滿洲能蒙古話者甚少即蒙古旗下人等善蒙古話者亦少將此告知各該管人等如能蒙古話於清話亦且有益將此亦令領侍衛內大臣等知之特諭

雍正五年十月十九日領侍衛內大臣公馬爾賽等

奉

上諭八旗護軍統領都統副都統等所挑訓練之護軍馬甲俱不肯令烏鎗營挑取殊不知因伊等訓練有成方行挑選若訓練不精則人豈肯挑選但當於挑選之後將其訓練日期之多寡登記檔案若伊等訓練之人被挑者多值朕問時可以陳奏嗣後伊等訓練之人爾等照常挑取將八旗烏鎗長槍營之護軍馬甲令各營之大臣六人各分一旗訓練其餘兩旗亦令均為六分如

此分別訓練則爾等所教之優劣亦可知矣大臣內或有差遣事故者即著一人暫行代伊訓練再每旗章京二員合為一處訓練兵丁伊等所教之優劣難以分別將各營兵丁亦行派為兩分令其分教至當差行走之處仍著一同管理特諭

雍正五年十一月初八日奉

上諭朕惟漢史始志地理蓋本禹貢職方之遺而條其郡邑紀其戶口以宣究其風俗教化也今各省皆有志書

惟八旗未經紀載我朝立制滿洲蒙古漢軍俱隸八旗
每旗自都統副都統叅領佐領下逮領催閒散人體統
則尊卑相承形勢則臂指相使規模宏遠條理精密超
越前古豈可無以紀述其盛況其間偉人輩出樹宏勲
而建茂績與夫忠臣孝子義夫節婦潛德幽光足為人
倫之表範者不可勝數若不為之採摭薈萃何以昭示
無窮朕意欲論述編次彙成八旗志書年來恭修

聖祖仁皇帝實錄今已漸次告成即著諸總裁官領其事選

滿漢翰林分纂其滿洲漢軍內有通曉漢文而學問優
長堪備纂修之任者無論進士舉人貢監生員以至閒
散人等俱著該旗都統副都統保送但勿徇情濫舉不
實以副朕慎重著述之至意特諭

雍正五年十一月二十五日奉

上諭歷來滿洲人材壯健弓馬技勇自古罕與比倫此天
下所共知者前令八旗查得親軍護軍內能開八力以
上硬弓者現有一萬八千餘人昨朕在瀛臺考試天下

武舉騎射之後令八旗硬弓百人當衆人之前校射伊等所用之弓有十八箇力者有十六七箇力者其餘則皆十三箇力以上至十五箇力不等舉重若輕從容合度衆武舉等見之咸驚異以為實係從來目中之所未覩朕心甚為嘉悅其開十八箇力弓者著賞銀一百兩十七箇力者賞銀九十兩十六箇力者賞銀八十兩十五箇力者賞銀七十兩十四箇力者賞銀六十兩十三箇力者賞銀五十兩伊等藝勇超羣是其盡心學習之

所致而朕之深加嘉獎者則以伊等鼓舞振興專心向
上竭誠勉勵之故衆人不可因此次加恩遂皆以弓力
相爭尚嗣後以十五箇力為止不許再加總以誠心演
習精詣熟練為要將此通諭八旗知之特諭

雍正五年十一月二十六日奉

上諭舊例執纛俱用左手今年少兵丁不知此例乃用右
手執之將朕此旨應行傳示之處徧行傳知令記檔案
再各省滿洲駐防將軍處亦徧著行知令記檔案特諭

雍正五年十一月二十八日奉

上諭

壇

廟祭祀典禮攸關理宜潔淨齋戒聞得大臣官員於齋戒處
飲酒嬉戲殊失敬謹之意理應派官稽察嗣後派監察
御史二員各部院衙門司官四員每旗派賢能旗員各
一員內府官員二員三旗侍衛二員前往

壇內嚴行稽察查出即行叅奏其齋戒臨近時將旗下大臣

職名具奏朕酌量派往至於旗下大臣俱有管兵責任
祭祀前期一日不必前往

壇內齋戒於各該旗衙門齋戒至次早豫先前往再

天壇內有放鷹打鎗成羣飲酒遊戲者著令禮部太常寺嚴
行出示禁止仍不時派司官前往稽察如有此等之人
即行嚴拏交部治罪特諭

雍正五年十一月二十八日領侍衛內大臣公馬爾
賽尚書特古忒奉

上諭馬駝折臆之法最為緊要折臆得法則馬駝不躓不跛且臆亦甚壯容易不瘦今見拴養馬駝之兵丁等多皆不知折臆之法因將拴養馬駝折臆之法特行開錄宣諭衆官兵等衆官兵務各加意學習特諭

雍正五年十一月二十八日奉

上諭恩賞銀兩乃朕特施之恩典喜事尚可稍緩喪事則不可遲誤若有冒領之人既治以罪仍可扣其數月錢糧再聞得有將官馬駕車者官馬俱有火印爾等宜加

嚴禁朕亦派人稽察特諭

雍正五年十二月初二日奉

上諭紫禁城內該班之章京兵丁等俱係飯後換班著每日賞給一次飯食將此飯食務令潔淨溫暖豐盛適口於一次飯食之分例再加半分置辦其監管及造飯人等如有從中侵蝕者著嚴行稽察重加懲治特諭

雍正五年十二月初四日奉

上諭凡奉旨記名令補用驍騎校人等不應於別佐領下

之缺擬正嗣後驍騎校缺出其本佐領下有應補之人即行開列若本佐領下無人或因本佐領之驍騎校不能辦事草退之缺再將記名之人引見特諭

雍正五年十二月初六日奉

上諭為治之道首重得人朕臨御以來夙夜孜孜廣為諮訪期得人材以理庶政而內外臣工所保舉之員其中秉公推薦足備任使者固不乏人而徇私濫舉及苟且塞責者亦復不少即如前年令各省督撫藩臬各密薦

屬員一人而王朝恩王景灝所舉者則甚為庸劣又如
令督撫等保送所屬武官而督撫中遂有不加詳慎但
就叅遊等所申送之人即呈奏朕前者又或督撫欲薦
人而授意於兩司兩司欲薦人而請教於督撫似此草
率從事揆諸古人所云以人事君公忠為國之義豈不
大相違背乎朕思薦舉人材關係國家辨材論官之要
道舉得其人則政事無不就理舉非其人則弊端從此
而生孟子曰立賢無方孔子曰舉爾所知觀聖賢之言

則知得人之道宜廣其途以為收羅而各舉所知庶可以收克知灼見之益也今特諭內外諸臣等京官自翰林科道郎中以上外官自知府道員學政以上武官自副將以上旗員自叅領以上皆令每人各舉一人滿洲官員則保舉滿洲漢軍官員則保舉漢軍漢人官員則保舉漢人文職官員亦許保舉武職武職官員亦許保舉文職於滿漢文武內或係現任職官或係候補候選之人或係進士舉人貢監生員或係山林隱逸務期有

猷有為有守品行才具足備國家之用者各人密封奏摺赴奏事人員處轉奏外官則遣家人齎送密摺來京付奏事人呈進即或親戚子姪等亦可據實薦奏不必以嫌疑引避但京官如尚書侍郎外官如督撫提鎮兩司皆係朕已經深知簡任者不必入所薦之列其奏摺內只開列本人官銜姓名註明所薦之人官銜考語不必引頌聖之繁文敷衍粉飾此朕旁求俊乂之苦心冀賢才輩出師濟盈廷俾百職得宜庶務畢舉凡有保舉

之責者不得瞻顧私交不得受人囑托不得互相商議
不得輕聽風聞夫十室之邑必有忠信凡人生平豈無
一人熟識深知者況既列朝紳受國家之爵祿而朕又
推心置腹畀以舉賢薦能之美事倘猶有懷藏私意濫
舉非人者清夜捫心尚可以為人乎且朕之觀人往往
洞見隱微將來觀所舉之人即可知舉人者心術之公
私識見之明昧亦不使諸臣得以行其私也著內外滿
漢文武官員遵諭行特諭

雍正五年十二月初八日奉

上諭嗣後獲罪革職之人經朕復加錄用即無罪矣承襲官職之時照常將伊等之子開列將此著為定例傳諭八旗登記檔案特諭

雍正五年十二月十三日奉

上諭家譜內開載現管佐領字樣甚好將此令八旗大臣等知之嗣後俱著照此繕寫特諭

雍正五年十二月十三日上駟院將鋤草夫六十一

解送錢糧於回空車內拾得元寶一箇不敢動用呈報該衙門一事具奏奉

上諭此一鋤草夫役於伊車內拾得銀兩不自隱瞞即行報出深屬可嘉著即將此銀賞給併將此事通行曉諭八旗咸使聞知特諭

雍正五年十二月二十日前鋒統領達福等奉

上諭稽察兵丁係甚善之事都統拉錫管正白旗時特派二三十人稽察匪類大有成效其後補授鑲白旗都統


仍派二三十人令其稽察亦覺有益爾八旗都統前鋒
統領護軍統領等亦應將各該旗可信之章京兵丁派
出令其不時稽察若伊該旗之人有於他處被人挈獲
者伊等亦必罹罪將爾等派出之官員等嚴加曉示則
不肖之匪類有所畏懼亦知悛改矣再著旗下大臣一
員輪班總理稽察將此諭各大臣等知之特諭

雍正五年十二月二十三日奉

上諭長槍營兵丁亦令學習鳥鎗其長槍不可荒廢特諭

雍正五年十二月二十八日奉

上諭嗣後召入旗下大臣時滿洲大臣等著於滿洲大臣
內論其班次蒙古大臣等著於蒙古大臣內論其班次
漢軍大臣等著於漢軍大臣內論其班次特諭



世宗憲皇帝上諭八旗卷五